



Uunga siunnersuut: Sulisoqarnermut akitsuut pillugu Inatsisartut inatsisaata allanngor-tinneqarnera pillugu Inatsisartut inatsisaat

(Aningaasaqarnermut Aatsitassanullu Naalakkersuisoq)

Naalakkersuisut siunnersuuteqarput sulisitsisut sulisoqarnermut akitsuummik akiliisarnerisa ulluata piffissaliunneqarsimasup allanngortinneqarnissaanik, qaammatip akiligassanngor-fiusup 20-aaniit qaammatip tulliuuttup aallartinnerata ulluata aallaqqaataanut nuutsillugu.

Piffissaagallartillugu kingusinnerpaamik akiliiffissaq arfininngorneruppat, sapaatiuppat nallittuuppalluunniit, piffissarititaasoq ulluinnarmut tullermut sivitsorneqartussanngorlugu.

Tassa imaappoq akiliisussaataaneq ullunik aqqaneq marlunik kinguartillugu, immaluunniit siuartillugumik aamma oqaatigineqarsinnaasumik.

Tamannalu pillugu matumuuna Inuit Ataqatigiit siunnersuut imatut oqaaseqarfigissavarput:

Naalakkersuisut taamatut allannguutissatut siunnersuuteqarnerminni tunngavilersuutaasa ilagaat sulisitsisut sulisoqarnermut akitsuummik akiliisarnerat nalinginnaasumik pisarnerat akileraarutit A-t akilerneqarnerat ilutigalugu, minnerunngitsumillu siunnersuut Akileraarnermut Aqutsisoqarfiup sulisitsisut akiliutaannik naatsorsuutitut nalunaarsuilluni sulineran-nut allaffissornikkut sipaarutaangatsiarsinnaanera.

Naak naalakkersuisut tamaatut tunngaveqarlutik siunnersuuteqarnerat paasilluarsinnaagaluarlugu, taamaattoq inatsisissatut siunnersuut inatsisartunut saqqummiunneqannginnermi eqqortumik tusarniutigineqarsimannginnera uparuangitsoorsinnaanngilarput.

Nassuiaammi takuneqarsinnaavoq juunip 11-aniit julip 16-at ilanngullugu 2014 inatsisissatut siunnersuut tusarniutigineqarsimasoq. Tusarniaffigineqarsimallutik suliffeqarfiit kattuffiillu attuumassuteqarsinnaasut arlalippassuit, ilaatigut soorlu makkuusut;

KANUKOKA, Kalaallit Nunaanni Sulisitsisut Peqatigiiffiat (GA), NUSUKA, S.I.K., KNAPK, KPMG Grønland, Deloitte, Grønlands Revisionskontor, Aalisarnermut, Piniarnermut Nunalerinermullu Naalakkersuisoqarfik aamma Inuussutissarsiornermut, Aatsitassaqarmut Suliffeqarnermullu Naalakkersuisoqarfik.

Tusarniaanerullu inernilerneqarnerani takuneqarsinnaavoq tusarniaffigineqarsimasunin-ngaaniit taamaallaat pingasuinnaat kisimik akissuteqarsimasut, tassaasut Kanukoka, GA aamma SIK.

Kanukokallu akissutigisimasaa maluginiannngitsugassaannngilaq; Kanukoka akissummini allappoq akissuteqarnissamat piffissaliunneqarsimavoq sivikippallaaqimmat akissuteqar-

sinnaasimanatik, minnerunngitsumillu innersuussutigalugu isumaqatigiissutigisimasartik tassalu, julip qaammataani tusarniaasoqartannginnissaanik isumaqatigiissutaasimasoq.

Kanukokallu aamma kissaatigisimavaa inatsisartunut ilaasortat ilisimatinneqassasut inatsisissatut siunnersuutip tusarniaassutigineqarnera kommunit akissuteqar-figiniangikkaat, Namminersorlutik Oqartussat kommunillu julip qaammataata tusar-niaaffiusassanngitsumik isumaqatigiissutaat 20.maj 2010-meersoq eqquutsinneqanngim-mat.

Inuit Ataqatigiinniit nuannaarutigaarput Kanokukap kissaataa piviusunngortissinnaagatsigu, tassalu inatsisartut ilisimatinneqarnissaat isumaqatigiissutip eqquutinneqarsinnannginnera-nik inatsisartut ilisimatinneqarnissaat pillugu.

SIK-ip tusarniaanermut akissummini oqaatigaa tusarniaanermut piffissaliussatut ulluliunneqarsimasut immikkoortoq 8-miittut, tassa oqartussaasunik kattuffinnillu tusarniaaneq, eqqortuunngitsut.

Taamaatumik tamanna tunngavigalugu; Inuit Ataqatigiinniit siunnersuutigisavarput, inatsisissatut siunnersuut aappassaaneerneqannginnermini tusarniutigineqaqqaassasoq, tusarniuussutigineqarnissallu siunertaralugu naalakkersuisunut utertinneqarallassasoq.